

Mál 11/2017

Ár 2018, fimmtudaginn 15. mars, var haldinn fundur í siðanefnd HRFÍ að Síðumúla 15, Reykjavík.

Fyrir var tekið mál nr.11/2017

x

gegn

Y

og kveðinn upp svohljóðandi úrskurður.

I. Málsmeðferð siðanefndar.

Í erindi kæranda Hundaræktarfélags Íslands sem barst siðanefnd 27. mars 2017 er farið fram á úrskurð siðanefndar vegna þess að kærða Y hafi gerst brotleg við grundvallarreglur fyrir félagsmenn í HRFÍ með því að para rakkann A við tíkina B, án þess að rakkinn væri með gilda augnskoðun við pörun. Kæran var send kærðu til umsagnar með bréfi dagsettu 6. desember 2017 og henni gefinn andmælafrestur til 3. janúar 2018. Svar dags. 10. janúar barst frá kærðu. Afrit þess var sent kæranda til umsagnar sem svaraði ekki efnislega en bað um að haldið yrði áfram með málið. Þar eð siðanefnd taldi að öll gögn er máli skiptu væru fram komin þá ákvað nefndin að taka málið til úrskurðar.

II. Helstu málsatvik og ágreiningsefni.

Samkvæmt innsendu pörunarvottorði dagsettu 15. júní 2016 var rakkinn A paraður við tíkina B, án þess að rakkinn væri með gilda augnskoðun við pörun. Hundarnir eru af tegundinni Dvergschnauzer og er rakkinn í eigu kærðu. Kærandi telur að með pöruninni hafi kærða brotið gegn grundvallarreglum fyrir félagsmenn í HRFÍ þar sem rakkinn var paraður við tíkina 7. apríl 2016 þegar augnvottorðið var rétt tæpra 2 og hálfis árs gamalt, en hann var síðast skoðaður 16. nóvember 2013. Í svari kærðu kemur fram að kærða var í góðri trú þar sem rakkinn fór í augnskoðun 16. nóvember 2013 og ekki var nein augnskoðun á vegum kæranda fyrr en 21. maí 2016.

III. Forsendur.

Samkvæmt grein 2.6 í grundvallarreglum fyrir félagsmenn HRFÍ skulu félagsmenn er nota hunda sína til ræktunar vera trúir ræktunarstefnu HRFÍ og vera vel að sér um það ræktunarmarkmið sem gildir fyrir viðkomandi hundakyn og í reglugerð um skráningu í ættbók HRFÍ, reglur sérdeilda segir um hundakynið Dvergschnauzer:

„Augnvottorð: Vottorð má ekki vera eldra en 12 mánaða við pörun. (Gildir frá 1. mars 2007). Vottorð má ekki vera eldra en 18 mánaða við pörun. (Gildir frá 20.01.2010). Greinist hundur með staðfesta arfgenga starblindu (cataract) skal hann skráður í ræktunarbann (Gildir frá 1. apríl 2011).

Greinist hundur með arfgenga vaxandi sjónurýrnun (PRA) fást hvolpar undan honum ekki ættbókarfærðir. Hundurinn, foreldrar og afkvæmi hans eru sett í ræktunarbann. (Gildir frá 01.09.2012).“

Óumdeilt er samkvæmt gögnum málsins að rakkinn var ekki með gilda augnskoðun við pörun. En slíkt vottorð eitt þeirra gagna sem áskilin eru um heilsufarsskoðun hundakynsins og mikilvægt að það liggi fyrir við pörun til þess að tryggt sé að hundurinn beri ekki með sér erfðagalla eða sjúkdóm. Rakkinn fór svo í augnskoðun 21. maí 2016. Það breytir ekki brotinu að rakkinn hafi staðist skoðun eftirá, það var ekki fyrirséð og telst kærða því vera brotleg við grundvallarreglur fyrir félagsmenn í HRFÍ.

Þar eð kærða hefur ekki áður svo vitað sé gerst brotleg við reglur félagsins þá þykir hæfileg refsing vera áminning.

IV. Niðurstaða

Kærða Y telst hafa gerst brotleg við grein 2.6 í grundvallarreglum fyrir félagsmenn í HRFÍ. Það breytir engu þó kærða hafi sagt sig úr félaginu 12. desember 2017.

Kærða er áminnt.

F.h. siðanefndar

Guðríður Valgeirsdóttir

Guðrún Margrét Baldursdóttir

Kristín Sveinbjarnardóttir